

四庫全書

集部

欽定四庫全書

宋詩鈔卷四十一

內閣中書舍人吳之振編

徐積節孝詩鈔

積字仲車楚州山陽人少孤從安定學門下踰千人  
獨以別室處之遣婢視飲食澣濯盛寒一納裘以米  
飯投漿甕中日食數塊而已事母至孝以父名石平  
生不用石器遇石輒避母死廬墓哀號三年如一日

每以五字教學者公卿部使者交薦除楚州教授改  
防禦推官又特改宣德郎崇寧間又特除西京嵩山  
中嶽皆非常制七十八卒於家謚節孝處士先是枕  
書卧冊間大書曰五月榴花不宜開直待徐郎來筆  
蹤不類人世書卒時適五月一日人皆異之詩文用  
腹藁嘗曰文字在胸中未暇出者甚多也晚年耳疾  
不發遠書率以小詩報之

和楊掾月蝕篇并序

楊子常掾為月蝕篇示予辭義甚偉某不敢虛辱其  
貺迺吟哦而和之詩曰彼月而蝕則維其常春秋月  
蝕不書其非大變也可知矣形而為詩歌若無不可  
者遂卒賦之云爾

元豐之元歲戊午斗柄斜指西南維月行赤道日南陸  
營丘分野星虛危昨夕既望復今夕盛若不損盈不虧  
安知變起在頃刻突如有物侵其肌其始色變甚倉黃  
須臾赤黑相合離良久煙焰極薰燎一團白玉燒為灰

黃琮蒼璧不可辨枯株死兔將安歸孰烏其吻吞巨皿  
孰丹其汗流墨池如食非食始為薄有物無物不可知  
蝦蟇何物敢張口麒麟何故敢爭鬪是何星曜敢侵犯  
自是其形不可久君不見對月數眉毛須臾引臂不見  
手嗟噓天上之神物乃有如此事所蔽至甚不可解凶  
而家室亡而身不然借使幸而免後世譏笑遭惡名君  
不見漢朝賈生文有餘其心大勇其才疎當時如必用  
其術紛紛不免危其軀鼃錯堂堂蔽於刻公孫規規蔽

於諛谷永之才蔽權勢有若鷹犬供指呼霍光雖賢亦  
有蔽何不早去顯與馮子都劉歆致位為國師豈若揚  
雄久以為大夫蔽於太高李膺輩蔽於已甚陳蕃徒竇  
武不斷蔽可痛東之不忍蔽可吁王允所蔽在無權荀  
彧所蔽不早圖蕭禹之蔽入於佞王衍之蔽失之虛牛  
李雖奇蔽朋黨機雲雖俊蔽附趨王導蔽怨殺周顗遂  
良蔽誣殺劉洎崔浩蔽強殺其身所蔽若此甚可畏我  
愛安世真朴忠匿名遠世歸至公有私見求堅不許以

私求謝絕不通諸葛武侯為將相心迹皎然無所枉有  
罪至親而必誅有功雖讐而必賞謝安知壻王國寶不  
以身蔽能辨早人心自是悅而服不顧四肢與肝腦符  
堅之師號百萬一戰而北若權槁我吟此篇不足錄却  
憶唐衢忠義哭古人今人何擇焉大抵人心蔽多慾月  
之所蔽惟須臾須臾蔽去明如初人之所蔽何太甚至  
於終身不悟不可除月乎月乎明哉明哉善去其蔽何  
速之如君子法之所以改過賢者法之所以知非勇決

之徒所以奮發感慨之徒所以噓歎我雖老且病齷齪  
無所為猶能對月吟歌詩安得慷慨之士如桓伊把笛  
為予吹

大河上天章公顧子敦

萬物皆有性順其性為大順之則無變逆之則有害禹  
之治河也浚川而掘地水行乎地中其性安而遂因地  
為之防猶恐不足制故附之山足使循山而行山不可  
必得或原阜丘陵水行乎兩間既固而既寧及將近下



流山遠而地平渠裂為二河河分為九形雖暴不得怒  
雖盛不得盈所以順而制歸之於滄溟後代蒙其業歷  
世六七十凡千有餘年而無所決溢國君與世主豈皆  
盡有德蓋繇河未徙一皆循禹迹河道既一徙下涉乎  
戰國水行平地上迺堤防湮塞其時兩堤間寔容五十  
里水既有游息堤無所圯毀後世迫而壞河設始煩促  
伐盡魏國薪下盡淇園竹羣官皆負薪天子自臨篤其  
牲用白馬其璧用白玉歌辭劇辛酸姑不至號哭瓠子

口雖塞宣房宮雖築其後復此決分為屯氏河遂不復  
堤塞塞亦無如何兩河既分流害少而利多久之屯氏  
絕遂獨任一渠凡再決再塞用延世之徒有天時人事  
可圖不可圖有幸有不幸數說不可誣其後復大決大  
壞其田廬灌三十一縣言事者紛如將欲塞之耶凡役  
百萬夫費累百巨萬亦未知何如如此是重困是重民  
歎吁言事者不已亦不復塞諸李尋解光輩其言不至  
迂遂任水所之渠道自割除當時募水工無一人應書

學雖有專攻術亦有窮歟諸所說河者桓譚實主之但聚而為書實無以處之班孟堅作志亦無所出取事有甚難者雖知無所補今之為河堤與漢無甚殊遠者無數里近無百步餘兩堤束其勢如縛吞舟魚適足激其怒使之逃囚拘又水性隱伏有容而必居漫淫而灌注日往而月徂埽材有腐敗土壤有浮虛水進而不止正如人病軀病已在骨髓醫方治皮膚下不漏足脰上突為背疽或水如雷聲或埽如人喘或決如山傾或去如

席卷如蛟龍引陣如虎豹逃圈如地戶開闢如誰何生  
變如神物主之不可得而辨嗟乎有如此堤防豈能禁蓋  
緣平地上失水之本性而又無二渠分九河所任以九  
合為一所以如此甚今之為邑居多在古堤內以諸埽  
準之高於屋數倍以水面準之亦高數尺外諸埽正如  
城而土有輕脆民正如魚鼈處破湟畎澮被溺者常事  
不溺者幸大又河水重濁淤日以積又夏秋霖雨諸  
水湊以入故有必決勢不決者蓋鮮或決彼決此或決

近決遠或決不可塞或塞而復決或決於旦暮或決於  
歲月或新埽苟完或舊埽潰裂譬如千萬鈞用一繩持  
挈必有時而敗必有處而絕而自決大吳凡害幾郡縣  
河既北浸邊諸塘皆受惠亡魚與逸馬孰為之隔限今  
雖甚盛時亦防不虞變所以議論者復故道為便故道  
雖已高可復亦可為但恐既復後其變不可知我兵學  
雖陋公兵學雖奇我說兵之難公亦莫我違河事異於  
兵其難堪歟智有不可及力有不可施汲黯非不偉

所塞輒復隳王遵無奈何誓死而執圭若與唐衢說號  
哭垂涕洟未說穿故道未說治故堤且說塞河口所費  
不可推諸所調發者委積與山齊卷埽者如雲進埽者  
如飛下埽名入川其誓憂流移上埽名爭高少動即勢  
危萬人梯急赴兩大鼓急椎作號聲號令用轉光指麾  
其救護危急爭須臾毫釐又聞被灾郡數路方薦飢官  
私無畜聚民力俱困疲朝廷謀已勞兩宮食不怡生民  
仰首望使者忘寢飢為之奈何乎勿計速與遲事雖有

堅定議論在所持如一身所疾必以先後醫假如移所費用以業貧民償其所亡失救其所苦辛或貸其田租或享其終身獨孤有常餼使同室相親露屍與暴骸收斂歸諸墳精選強明吏處之使平均鄉官與胥徒欺者以重論如此庶幾乎可無愁怨人下酬更生望上慰再造仁然而論議者至今猶紛紛或復其故道或因其自然公如決於一勿使衆議牽在已者以義在命者以天而況行職分而況本誠忱聖朝無不察知子之赤心嗟余

何為者草莽且賤微與公本無素一見即弗遺以伯兄  
處我以古人相期小設猶致說大事寧無辭年且六十  
一未作溝中屍常恐公禮義如投諸污泥豈欲為迂濶  
不得已為詩瀝吾之肝膽但恐同兒嬉又恐誤公事公  
千萬慎思如將從近功即去圖便宜如必謀久利唯古  
人是希是詢而是度是訪而是咨或博物君子或宿儒  
老師或濱河野叟或市井年耆或愚直夫婦所言無蔽  
欺或老胥退兵耳聞而目窺或世為水學可與講是非



或博募水工按地形高卑從便道穿渠稍引河勢披海  
既為大畝汴既分一支如關竅疏通臟腑病可治此說  
如何哉但恐出於狂如何完障塞如何復諸塘觀變而  
待時亦恐謀不臧為復有說者且須嚴邊防如魏尚守  
邊見稱於馮唐如祭同久任使盜皆伏藏以車制衝突  
如衛青武剛多置強弓手如李廣大黃選募如馬隆練  
卒如高王如漢置奔命使我軍勢張短兵斫馬脰衝車  
亂其行賞不以首級所以嚴部分大陷刀如牆可以堅

吾陣羊叔子以德郭子儀以信光弼戰河陽揮旗令直  
進其時諸軍勢如決水千仞楊素不用車可汗下馬拜  
僅以其身免號哭而大敗將帥在方略勝却百萬兵安  
邊在良將勝却築長城願子治水功有以酬明時便領  
鐵林兵盡衣犀牛皮連營環繡帽大纛隨牙旗分金賜  
勇敢藏書付偏裨先聲義信遠下令霜風馳出塞有豐  
草近關無馬蹄穹廬大漠外別部黑山西代謀為上策  
何用長纓羈本朝正明盛以德服外夷使來不受獻南

越回山梯西閉玉門關東却高白麗四夷無一事各安  
巢穴棲名將更無功優詔勒鼎彝師旅作鼓吹軍容除  
虎貌銀鐙致郊勞翰林嚴鐫扉除書紙用麻省吏身著  
緋公方有所念山足江之湄無心入黃閣有表辭赤墀  
乞得老來身浩歌還會稽白雲與綠波無所不可之春  
風桃花塢秋色黃菊籬茶藍與酒榼壺矢兼琴棋烹鷄  
炊黍飴可倩龐公妻豈無會稽老雪夜同泛溪亦有一  
三子棹歌相追隨散盡囊中金留得身上衣有宅是官

借無田可扶犁閒吟題寺觀長嘯入雲霓公得我詩後  
一夢須先歸

李太白雜言

噫嘻歎奇哉自開闢以來不知幾千萬餘年至於開元  
間忽生李詩仙是時五星中一星不在天不知何物為  
形容何物為心胸何物為五臟何物為喉嚨開口動舌  
生雲風當時大醉騎遊龍開口向天吞玉虹玉虹不死  
蟠胸中然後吐出光焰萬丈凌虛空蓋自有詩人以來

我未嘗見大澤深山雪霜冰霞晨霞夕霏萬化千變雷  
轟電掣花葩玉潔青天白雲秋江曉月有如此之人有  
如此之詩屈生何悴宋玉何悲賈生何戚相如何疲人  
生胡用自縲紲當須華華不可羈乃知公是真英物萬  
疊秋山聳清骨當時杜甫亦能詩恰如老驥追霜鶻戴  
烏紗著宮錦不是高歌即酣飲飲時獨對月明中醉來  
還抱清風寢嗟君逸氣何飄飄枉教謫下青雲霄大抵  
人生有用有不用豈可戚戚反效兒女曹採蟠桃於海

上尋紫芝於山腰吞漢武之金莖沆瀣吹弄玉之秦樓  
鳳簫

答李端叔

有人頗似長沙傳得官亦望長沙去去時好賦楚江謠  
還使風騷滿江路便須酌酒弔三閭正是忠魂冤憤處  
縣令如今未去時蘭亭故事猶可為莫惜千筒萬筒往  
諸君方壯我已疲登科能究文章豪數竒老將詩能高  
長沙縣令號才吏方將睥睨謝與曹涼風即是八九月

紅萸黃菊花將發正是詩家得意時莫學古人悲暮節  
東南美者有吳姬紅襦繡袂無所施把酒一卮輕浩眈  
得詩一句勝娥眉山夫野叟只如此諸君達者應相嗤  
有酒且漫飲有歌且漫謳共君說懷抱未語先搔頭良  
久欲說說不得胸中有物如山丘君不聞東家女子花  
兒羞十六未嫁便悲憂牆頭樓上到日晚馬驟車奔如  
水流西家亦有閨中女月壁龍珠求未許有心自比蟠  
桃花無言竊笑陽臺雨謝鯤便是妾家隣敗唇折齒猶

相語何況五陵輕俠兒拋金擲玉教人非一夫奔處千  
夫馳不論榮辱與刺譏羶中之蟻醢中雞攫金逐獸兩  
眼迷主人下馬客已齊拜起俯仰容正俾有如六月賣  
蒲葵唯恐不售霜風淒言至於此良可悲所以慷慨見  
於詩誰能起舞誰能歌甕中有物如秋波古來多少無  
奈何要須一醉都銷磨茫茫人間岐路多不如海水通  
天河

俊老行送林次中赴都司

并序



客有張文潛與之夜坐論事良久及林公之義於是  
兩人者名公為俊老因公之去作俊老行送諸御者  
為公一笑也

熙寧察院一開口誰人膽落御史手其時面堅黑髭鬚  
力欲回天氣衝斗一從蹭蹬作外官所居不苟心迹安  
剛不可回堅不變頭如霜雪心如丹所以論者悅而服  
所養有義其質端東西南北二十載一朝有勅却召還  
卓囊封上曉班肅繡衣步入秋霜寒義有所徇乞得身

白日降下天上人黃金龍節青囊印赤帷熊乘朱斑輪  
以其餘才修職分以其餘力娛精神望淮樓上對秋色  
玉女花前泣晚春時時共帳過南郭來就陶潛漉酒中  
與人論事不必合直無所苟氣色真持此以往無不可  
古人所以為正臣淮南一路事如草嘉苗惡莠俱分了  
中心皎皎如斯乎外計區區何足道兩宮日月方齊明  
羣公戮力營太平公議急須招俊老清風先已過南京  
莫飲吳江水寄陳瑩中

莫飲吳江水胸中恐有波濤起莫食湘江魚令人冤憤  
成悲呼湘江之竹可為箭吳江之水好淬劍箭射讒夫  
心劍斫讒夫面讒夫心雖破胸中膽猶大讒夫面雖破  
口中舌猶在生能為人患死能為鬼害患兮害兮將奈  
何兩庖薄酒一長歌灑向風煙付水波遣弔胥山共汨  
羅

瓊花歌

春皇自厭花多紅欲得花顏如玉容春皇青女深相得

先教斂與秋霜色乃有雪月供光星榆獻白斛量銀漢  
琉璃濕人間美玉搗作灰荆山昆山鬼神泣天上有人  
名玉女投壺之外能為素姑射神人解種花先須此物  
為根芽天罅地竅掬精粹蟾身驪頤偷光華其時正是  
天地交二氣上下陰陽調此花孕育得其正其間邪氣  
無纖毫所以其色為正色出乎其類拔乎萃一如君子  
有諸內粹然其色見於外三月將盡四月前百花開盡  
春蕭然揚州日暖花開未春香不動花房閉仙掌秋高

玉露濃蛟人泣下珠璣碎黃鸝本是花中客啼盡好聲  
求不得春皇費盡養花心春風使盡開花力春歸鶯去  
花始開誰人放出深閨來唐家天子太平時太真浴罷  
清華池紅裳繡襖厭君眼更作地仙披羽衣麻姑睡起  
蓬萊島風吹玉面秋天曉洛川女子能長生冰生肌骨  
成瓊瑤褒姒不見諸侯兵盡日不笑如無情宋玉移家  
安在哉東隣不畫燕脂腮卓文君去成都速錦衣金翠  
幃裝束吹簫容貌果何如見說其人名弄玉若比此花

俱不足淫妖怪豔文之累一如婦人有賢德不為邪色  
辭正色孀居之女能自持終身唯著大練衣又如正色  
立朝者不以柔媚為奸欺以此論之乃可量人之不正  
將胡為論德乃是花之傑論色乃是花之絕洛陽花名  
古云好看花須向揚州道君不見去年花下吹黑風霹  
靂閃電搜玉龍此時半夜花光中不覺屈曲蟠長虹又  
不聞天上琳琅樹種在煙霞最深處白雲枝葉白玉英  
此花莫是琳琅精此花愛圓不愛缺一樹花開似明月

襄王半夜指為雲謝女黃昏吟作雪杏花俗艷梨花粗  
柳花細碎梅花疎桃花不正其容治牡丹不謹其體舒  
如此之類無足奇此花之外更有誰世非紅紫不入眼  
此花何用求人知詩人自與花相期長告年年乞一枝

姚黃

并序

紫霄漫翁李道源見約分吟姚黃余畏其才不敢措  
筆不得已而後塞命因為之序曰天下牡丹九十餘  
種而姚黃居第一其名雖千葉而實不可數或累計

萬有餘英不然不足高一尺也花肉既重其梢下屈  
如一器欹側之狀此亦花之巨美而精傑者乎是宜  
見於詩而不可泯然使寂寂也

黃河南畔伊川北姚家宅是真花窟古來多少豪奢兒  
埋却千鶯萬鶯骨中央精粹得之多西方秀氣來相和  
天與明光常借日水宮暗脉正通河春風如酒半酣時  
誰教穀雨報花期司馬坂前嬌半啓洛陽城內人俱知  
姚家門巷車馬填牆頭墻下人差肩花上紅綃都蔽日



花傍翠幕恰如煙玉面兒來爭供帳錦袍郎去鬪拋錢  
無人不說姚花好費却春功亦不少日長風暖綠梢低  
坐上金仙困將倒鞠塵餅劑和香檀何以貯之承露漿  
爛錦脫來嫌太豔鮮衣染就欲驟驚君看此花肌肉豐  
一尺餘高千萬重粧面深藏青步障寶冠斜墮碧霞叢  
步搖好稱釵鳳凰玉環犀佩珠鳴璫帝女何緣心好道  
阿嬌安用金為房紺窠累棲舒雁雛沈煙噴出狻猊爐  
一種養成餘意態千花瘦盡春肌膚峨峨一器歌且傾

覆杯難辨鍾與觥染以蛟綃求正色叩之玉挺希宮聲  
魏家紅共牛家碧迭霸花中聳高格如今俛首甘下風  
九十種中為第一此花莫似武昭儀出得宮來不畫眉  
情貌欲為狐媚態衣裳却是比丘尼楊妃本是傾國身  
脫却紅襦號太真河水欲濡頭上髻馬嵬猶著舊時裙  
物色一定猶可疑人心作變宜難知容易莫評真與欺  
貌或如是心或非君不見老莊有深意萬物之中最防  
偽

管春風

我是蓬萊山上客，為管春風歸不得。  
今年更是春來遲，江南未寄梅花枝。  
探春童子青霞衣，時時去上青雲梯。  
春風消息若不遠，瑤臺瑤水冰霜淺。  
蟠桃花在海東邊，此花不發春一點。  
東風日夜來人間，到時先催草根軟。  
大都紅紫心先動，小桃先覺枝頭重。  
更有纖纖楊柳枝，路傍先得行人弄。  
詩翁自愛蟠桃花，鸞鶴不在無雲車。  
城南夜半無酒家，冰和雪吞月華有客笑。  
中攜劒去。

偷得銀瓶與肥豎詩公兩眼看浮雲為管春風不回顧  
花下飲

我向桃花下立飲一杯酒杯酒先濡鬚花香隨入口花  
為酒家媪春作詩翁友此時酒量開酒量添一斗君看  
陌上春令人笑拍手半青籬畔草半綠畦中韭閒鳥下  
牛背奔豚穿狗竇潛身猫相雀引喙禽呼偶包麻隣乞  
火穿桑兒餉糗物類雖各殊所樂亦同有誰知花下情  
猶能憶楊柳中心卒無累外物任相揉余方寓之樂自

號聞人叟

謝周裕之

樂不須絲竹花不須桃李舞不須輕軀歌不須皓齒人  
生各有樂顧我如何爾我是兩柳翁家在南郭裏詩酒  
以為樂賓客至即喜酒味酸或淡瓷枕粗而偉或無一  
釘菜但費幾張紙客所言用紙筆人情慕富貴公何眎賤鄙寒  
冷載肴酒暮夜煩屐履孚誠非粹然釘餌亦勞止不用  
卞郎瓠但坐杜侯椅兩棹合一尺一爐暖雙趾不以藥

隨時而用繒掩耳或啖魚菹盡或愛藏蘇美或取鱸與  
腊或約酒以指人皆悅真厚誰敢停箸七一客癯而清  
偶坐為六子吟聲尚鼓吹懽情勝羅綺俗物無所用高  
會有如此

富貴篇荅李令

我有一筒詩寫出千年意將令後世觀不是前言戲感  
君再唱洞庭謠我亦重歌酬子惠古人達者常有異姓  
王一門五侯三將軍兄弟同入中書堂對開大第連幾

坊私門列戟森鋒銳十二簾捲珠熒煌雙姬扶起坐牙  
床綠鬟紅袖花成行左盼右顧生春陽高車食客劒佩  
鏘堂上已滿坐兩廊巨釜大鼎烹牛羊玉壺挹酒金船  
長美人拜客求盡觴歌姬一誤已絕肮纏頭彩幣堆如  
岡酬歌買笑金鴛鴦奴袍火浣直兩箱三千廐馬紅錦  
障厠幃文繡爐薰香更衣侍妾如閨房主人意氣秋鷹  
揚其心端如彩鳳凰一言合意青雲翔須臾睚眦磨刀  
鎗門前鴈月可烘裳一日失勢成冰隍小者腰領屍道

苟大者連頸宗族亡犬雞散盡空遺墻野鳥入室山魃  
藏嗚呼哀哉可歎傷至死不悟猶陸梁古來如此有多  
少豈似洞庭湖上老無租無稅一生間有飯有魚一杯  
飽日落波間煙正昏雲開湖口山光曉棹翁適自巴陵  
迴掛帆直指瀟湘道有言不問俗窮通何憂可入翁懷  
抱脩竿短棹已自足更有前村一茅屋賣魚沽酒任醉  
醒繡戶朱門自歌哭嗟余未往心先慕更謝棹翁詢去  
住風前月下誰知醉魂魄吟魄自來去堂前畫作荆南



圖夢中記得巴陵路

寄范掾

昨日沽酒典布襖今朝所典未可保  
最好綿衾剝典錢  
又恐夜寒妻懊惱  
兩務酒官俱見怜  
沽我好酒如甘泉  
為報孟光莫惡發  
待將黃卷換青錢

贈張敏叔

張子生平最多難  
未老頭毛白一半  
頭雖更白詩更清  
正作詩時人莫喚  
頭不肖轉身不移  
口中聲調霜風淒

太清宮殿月明時第一莫吹松竹詩

寄張文潛

不知今之人誰識張縣尉勿問胸中事但看面上氣所謂人英者正是斯人輩前年南郭中文酒日夜會一從舍我去忽忽再逾歲今茲歲且盡為子吟不睡起坐却就枕伸頭出紙被約是三四更老老抱雙脚此時吟正酣聲調不可却春風起淮東須臾到嵩洛往往入子家但子眠不覺子覺將奈何聲盡情思多上東門外路洛

水生春波還我大松來不用寄詩歌

送端叔二首

并序

夜漏將盡枕上再送端叔也洛水之陽馬上為我誦  
此詩即此詩用木葉書投之水中便為將來故事也  
延安塞上見羣雁能為我誦此詩東南望否夜中枕  
上聞孤鴈聲尤數數誦此詩也紙窮意未盡

端叔上馬去巷口馬頭轉我喚端叔時端叔急回面記  
取此時意莫使落風埃上東門外水正望楚州來此水

一來不復見不及黃沙塞頭鴈

是物可寄情是物可寄聲不須使黃犬延州岐路遠莫  
怪不登淮上樓只為淮水不西流直待銜蘆鴈却迴其  
時隨到天盡頭

送張宜父赴南從幕府

正考

江南秋色芙蓉香滿江秋水傾銀潢泛水依花人姓張  
濤翻浪湧揮文章突然出者何蒼蒼巨鼇爆背來中央  
鼇鼉仰首仗四旁登臨談笑得庾郎安得霜鶻腰勝長

騎上秋空追鷗鷺北望海門形勢強美哉壯觀吳封疆  
若將前代論興亡直談孫氏到陳梁凡為佐命可哀傷  
其諸姦孽如豺狼傾譏正直誣忠良以國販賣為賈商  
歌姬舞女金滿堂不須為盜持刀鎗身雖幸免遺其殃  
子孫戮辱甚犬羊所以不欲讀史書鼻淚目汁沾鬚鬚  
潤州支使相如無山陽老子如唐衢

送陳留逸人

有人持一管不用蘆葉卷能作隴頭聲其女操六板吹

者寓其聲拍者會其情情聲與氣貌內外俱和平時時  
入酒家便插幾枝花歸來無一事醉卧日西斜人或問  
所得答云無憂嗟或問其所欲何物可相累我愛斯人  
者富貴所不如如有如此娛樂作何如稱呼呼為無憂人  
畫作無憂圖更畫幾枝花酒瓢與酒壺

送呂清叔

慘慘黃昏天欲雪蕭蕭淮浦人聲絕風擊寒雲鴈正鳴  
客眠孤棹燈將滅

和張文潛晚春四首

昨日枝頭紅鮮鮮染人指今朝尋不見已在汙泥底  
麥穎未黃乾桑實半紅濕恰得一犁雨田事正火急  
人事無如何多於道傍草但問酒有無莫管老不老  
風暖鶯窠牢雲晴鳥翅健物生自有樂亦各適其願

示諸生

子莫為文學纖麗須是渾渾有古意本源要在養諸中  
不然恐汝為時輩

答何楚才

有客能操耒而舍其良田有客善攻玉而探珠於淵二者之是非子以謂何如子乃捨所急若是其渠渠然余有二說可為不可為所謂不可者子家無寒飢所謂可為者奉養之所資余此二說者子當慎擇之余嘗竒子貌亦嘗憐子文不能為子謀嗟哉空云云

還崔秀才唱和詩

元白有餘勢孟韓無困辭子美骨格老太白文采奇當



時大道久破碎人人文字萎荂而支離天生數子將卓  
卓鳴鵲正成羣一鶚磨天飛嗟君不與數子共使君逸  
氣填塞無所施我來雖無知黃金白玉看如泥自從詩  
卷一入手掣然直上青雲梯十宵不睡亦不困厭賓日  
日闌柴扉秋風獵獵吹橫河蒼天萬里生銀波起來半  
夜吸一口睡魂酒病都消磨

贈慎叔良

昨日故人來慰此白領叟兩叟忽相見面色如飲酒將

此酒色面抵却春風寒飲酒豈易比懽好良所難我已  
五十八君已五十七人生勿草草兩公須努力

和李自明

自明多奇辭更為奇怪歌好共盧仝騎鯨耳吟哦直上  
崑崙坡更令張旭輩醉中揮筆書嵯峨安用呼老子兩  
脚踏橐駝有命得堅疾無術除沈疴一從水木迭用事  
肺為廢物囚網羅而況小暑之後有初伏與大暑更添  
熱厲兼昏魔骨間赫赤炭丸走皮上烘炙鐵手摩有時

一屋之內但覺湯火近不辨鑊與錫手持匕箸腹先脹  
酒到喉嚨顏已酡青黏漆葉無所用烏伸熊顧其奈何  
五臟熟云可湔洗百骸終恐生蟲窠脫身難上赤霄路  
夢魂忽泛滄溟波滄溟盡處是星漢有人常弄機與梭  
枯槎去後更無客歷歷赤桂來經過取得良書卦牛角  
持將斗柄吞明河但把明河吞滿腹不去龍田拾瑤玉  
便控黿頭出海來霞點震痕在眉目起穿兩柳行青莎  
怪歌使我須吟哦作文非小事要為法度後世無譏訶

大抵文章本諸內歸之無憾斯平和擬之於經輔之  
友精講明辨相切磋君雖病肝其心可用教我雖病  
肺心亦不自問日夜思索已矣老矣所學亡失多

和倪敦復

一別北軒君參商與秦越先聲從西來塵榻為君拂吟  
行時引頭吟坐即搖筆未見問行人既見惜短日緩頰  
相問勞劇談盡忠切耳竅雖塞豆口角自流沫崔子祥  
而論祝令閔且說離間菊參差樽中酒澄澈把酒自相

勸投菊兩不絕客主莫分辨僮僕亦娛悅若此龐公家  
妻子不羅列悔令唱驪歌惜不醉寒月念子為令尹行  
義高突兀當官志不回斂版腰可折與俗皆背馳而慕  
古遺烈竹節生便堅劒氣久已發其時東野外頻煩大  
夫謁篇章日相尋氣勢誰可遏仍攜大軸來使我兩日  
閱人事有合離歲月成恍惚逸翮騰方高駿馬足不蹙  
子實不我忘我亦不子忽與之氣類同見之心欲豁金  
城不可破鐵壁不可奪擇交蓋已定言志亦已合布陣

詩甚詳揮灑手不歇更約臨行時斯言可贈別

答范君錫

報漫翁無錢可沽酒青衫典不得黃卷賣不售借問公  
田中秣米種幾斗休管將來早與水莫為妻兒種粳米  
兄來留下二萬錢送與酒家主人未不然何計見春風  
空將花插白頭翁簿書營營幾時了何如載酒訪揚雄  
誰何哭

誰何哭哀且危白頭母朱顏兒兒忽捨母去母何用生

為架上有兒書篋中有兒衣兒聲不復聞兒貌不復窺  
誰何哭哀復哀腸未絕心先摧母恃兒為命兒去不復  
來朝看他人兒暮看他人子一日一夜間十生九復死  
君不見昨夜人靜黃昏時含心抱痛無人知其時忽不  
記兒死倚門引頸望兒歸

鴈從何處來

鴈從何處來正望東南飛毛間認白露肚下看殘暉浮  
雲共煙水日夜為所依衡陽是故山但恐故人稀

哭醇醇

東門園上春風微醇醇塚上花成圍醇醇一去不復返  
食一盂兮酒一卮悲莫悲乎今日傷莫傷乎舊衣思其  
言而想其貌吁嗟乎天喪吾兒

哀哀詞

哀哀復哀哀哀至此極孤兒與慈母中路忽相失恍  
惚須臾間終日不復得誰復坐我堂誰復入我室誰復  
飲兒酒誰復哺兒食兒飢誰復念兒寒誰復恤耳不聞



慈語目不見慈色譬如行路人日遠如一日行人猶可  
期遠道猶可追天窮地盡處一日猶可歸哀哀復哀哀  
此去無盡時誰言生離別不如死別離君不見人已閉  
門鳥已棲黃昏塚畔孤兒啼

送倪敦復

手持報簡人歸後足步迴廊角住聲但恐舟行隨早晚  
此時秋色半陰晴明朝路向雲邊望今夜詩須枕上成  
四壁無燈窗有月直無老夢到三更

寄張景修

東南未回客行樂又經年吳市花朝酒松江月夜船窮  
閭無屋住廣殿有詩傳若論平生事無如任自然

和孫元規資政游園

紅作簾帷翠作裯隨軒歌舞一時新未知醒者何如醉  
且向樽前莫負春煙重柳梢寒蘸水日高花徑暖生塵  
自從三月芳菲後誤入桃源又幾人

謝蔡子驤

好客重來直上廳  
龐家妻女合炊粳  
名言一坐令誰聽  
老病雙瞳為子明  
有道長官方就祿  
無能司戶欲歸耕  
如斯出處俱平易  
義理難時即共評

夜賞春寄敦復

莫道山陽官辛苦  
大夫未是不閒人  
晝來琴上披尋曲  
夜入花間點檢春  
拖袂帶歸香滿地  
迴燈引去蝶隨身  
高才自有風流格  
吟作吳謠事最新

示汝弼

十載交情義有餘  
離羣還歎索然居  
一番思我須成夢  
每度人來定寄書  
此日相從尤歎密  
他時何處覓迂疎  
回來徑哭青塋墓  
莫向南城問舊居

送至機

閉門有幸藏衰病  
策杖無因奉俊游  
繩纏觔骸方就枕  
火燒皮骨正思秋  
覽君健句如逢藥  
慰我孤懷勝凭樓  
見說東裝行未得  
夢魂先到楚江頭

寄路倅洪澤阻水

莫教容易過龜山多少人心願復還更有南城黃綬客  
但吟西戶綠楊間纔經濁汴無沈浪且趁清淮洗醉顏  
安得就公歌一曲緩吟遲步夕陽灣

和路朝奉新居十五首

世俗紛紛事總虛詩翁今作逸人居勤穿東地緣栽竹  
喜占明窻為著書近市好賒春肆酒就淮仍買晚罾魚  
忽撐小艇來西郭不問皆知訪仲車

詩翁愛酒典衣沽六子將孫侍燕居正要白家醇釀法

不須劉德偽金書  
厨經雪後炊無黍  
門近淮瀕食有魚  
何以獻公尋長物  
庾郎三韭載盈車

昔也聞名誦子虛  
今來白領隔城居  
新詩解道論頭句  
舊客仍移把臂書  
北郭風高真隱豹  
南州循政喻烹魚  
歸時見說臨川路  
父老爭留太守車

陳傅門前客姓徐  
有何智術佐間居  
接簷俛仰令遮雨  
縛竹縱橫為架書  
趣露劖田移草木  
和灣汲水貯龜魚  
上元已過清明近  
更約尋花不用車

誰家住處近田廬朝奉抽簪就退居竹葉已成新歲酒  
梅花未領故人書呼童解袂捫飢蟲起日開箱曝蠹魚  
一似散仙閒到夜卧屏仍看五雲車

坐想堂前弄白髮蒲茵筍席正高居綵衣六子傍供膳  
錦髻諸孫自教書愛士主人新置榻清身太守舊懸魚  
更吟整斗論頭句勝却西庵詩一車

不辨時人直與迂濯纓且喜近淮居朝衣脫後常耽睡  
野史修時或借書恨乏青山供採藥愛看白鳥伺吞魚

東園賣酒花開近待看詩翁倒載車

薄領脫來如一夢身名全後喜寧居生來自信無非義  
世上何緣作謗書所養有源如大水其賢可樂比嘉魚  
願公八十為更老玉幣三徵乃就車

自是平時大隱徒何須水宿與山居都無長物垂空橐  
却有閒房聚逸書近見雪消思野蕨遙呼船問憶江魚  
却帆便去尋村酒醉使兒孫推鹿車

身著練袍履用蒲鶖冠鳩杖稱郊居家中但乏青囊印



坐處便看黃卷書，賃屋為無揚子宅。休官非為武昌魚，  
長年不出何妨事。況是門懸致仕車。

夷白先生好對廬，醉吟處士作鄰居。幅巾自去呼樵父，  
蠟屐何時訪竹書。坐想高談搖麈尾，情知相詆跨鯨魚。  
更憐同姓陪樽酒，勝却荀生得御車。

路家巷口是何渠，半似城中半野居。已退白仙常按曲，  
未歸陸俊漫傳書。雪消牆外逢桃葉，日暖門前見捕魚。  
更有花間行處樂，舊時歌舞願隨車。

好養玄猿共鶴雛  
茆茨蓋屋竹間居  
家無越使千金橐  
腹有齊臣四部書  
一自臨川登畫鷁  
便煩別駕掌銅魚  
吟哦還作詩仙退  
恰似騶鸞鳳駕車

世間詩淡鄭雲叟  
壽且安寧陶隱居  
愛酒自開浮蟻甕  
耽詩如好換鸞書  
穉冠戴後簪筇竹  
鶴氅披來控鯉魚  
學作蓬萊吟醉客  
何須駟馬駕安車

西庵翁上北城隅  
為望臨川舊守居  
所恨足無雙翅鳥  
但將詩代一函書  
甥教洗榼多沽酒  
妻使磨刀細切魚

灑掃待公來獻壽親扶杖履醉升車

和石宣德五柳亭

安正

五柳神君氣貌端所希所向靜而安每思往行投閒地  
肯逐時情慕熱官秫酒易醒風戶猛葛巾難卧月窗寒  
也應種得東籬菊好置籃輿自在觀

戲呈評事

三事

我向燈前置酒盃南軒北戶一時開如今正是花時節  
且放春風數路來

寄蔡子驤

為報廬陵客逢人且寄聲不知無恙否何日到南城

和張文潛晚春

易貯千尋水難藏一點春也須幾杯酒還似送行人  
渡水衣須汲穿林手自披經春脚力軟但恐上山遲

二老寄朱廣微

二首

二老相思又隔年僧窗閒坐復何緣吟翁最好鹽城住  
時把歌詩付酒船

寄聲切問朱監利對面勤詢劉貴池或見廣東程使者  
為言收得寄來詩

吳舒信道

淮干風起木枝搖領下簷歐一尺高我是折薪扶耒手  
中丞且莫笑麤豪

上林殿院次公

九首

衰翁太半白髭鬚活到明年六十餘未死須為治河說  
此生難就賑飢書西庵共坐諸僧榻南郭親逢大使車

記得偶同詩韻否淮東使者亦嗟歔

林氏家藏萬帙書五船便可當五車別顧客舟施坐榻  
更謀官舫作行厨寫時教子烘青竹讀處呼童捉蠹魚  
悔不早知都借取終身挾策灌園蔬

贈黃魯直

不見故人彌有情一見故人心眼明忘却問君船住處  
夜來清夢繞西城

華陽山和查教授

玉井溫溫漫月華  
憧憧松檜聳高牙  
半峰已斷人間路  
絕頂自開天上花  
可恨白雲吟處起  
何堪行路望中賒  
怪來得似希夷子  
借問如今有幾家

宿山館

煙蘿斷處初逢舍  
雲竹疎時忽見燈  
嶮磴未歸樵鳥叟  
破庵已去誦經僧  
暗龍吟罷庭無月  
寒狄啼來谷有冰  
君看牀頭鐵鱗甲  
雨痕苔暈幾千層

倦客待沽山下酒  
飢童先上竈頭燈  
行經怪穴思防虎

坐聽疎鐘欲訪僧手弄一張琴似鐵匣藏三尺劒如冰  
調高器古無人伴身上煙霞空幾層

龍歸潭面千尋黑虎視林隈兩炬燈執爨正燃炊飯火  
乞飡恰值寄眠僧倦聽雨後諸巖溜渴憶春前一片冰  
卧看滿山紅日曉碧瑤城闕鬱千層

厨頭火滅童偷飯梁上巢空鳥避燈入夜更無同舍客  
今朝唯有放猿僧樵庵已貯霜前果竹院猶存鴈後冰  
誰道煙霄花上處一梯雲級萬餘層



送李守

莫說真州南畔路楚望亭南路已遙只可寄聲來見問  
更難折簡去相招船頭何處逢秋水山下誰家把酒飄  
且趁潮行急搖櫓到江州後更無潮

癸亥六月十三日  
與朱至機坐間得

此到江州後更無潮一  
句其夕枕上成篇也

哭張六

并序

張六子莊死矣十一月十三日夜四更時積用素服  
望其所居哭之哭且為詩明且涕泣以書使孤甥老

老致於樞前嗚呼哀哉

欲視目已瞑欲語口已噤欲動肉已寒欲書手已硬惟  
有心上熱惟存心中悲此熱須臾間此悲無休時所悲  
孤兒寒所悲孤兒飢苦苦復苦苦此悲遂入土



宋詩鈔卷四十一

欽定四庫全書

集部

宋詩鈔卷四十二

詳校官中書臣賈鏐

主事銜臣徐以坤覆勘

總校官編修臣王燕緒

校對官中書臣劉源溥

謄錄監生臣鄭家屏

欽定四庫全書

宋詩鈔卷四十二

內閣中書舍人吳之振編

陳與義簡齋詩鈔

與義字去非號簡齋汝州葉縣人登上舍甲科歷  
太學博士擢符寶郎尋謫監陳留酒稅南渡後避亂  
襄漢轉湖湘踰嶺嶠召為兵部員外郎紹興中累官  
翰林學士知制誥至叅知政事卒年四十九少學詩

於崔德符問作詩之要崔曰工拙所未論大要忌俗  
而已嘗賦墨梅受知徽宗遂登冊府尤喜其客子光  
光陰詩卷裏杏花消息雨聲中之句天分既高用心  
亦苦意不拔俗語不驚人不能出也晚年益工旗亭  
傳舍摘句題寫殆徧號稱新體體物寓興清遠紆徐高  
舉橫厲上下陶謝韋柳之間劉後村謂元祐後迭起  
不出蘇黃二體及簡齋始以老杜為師建炎間避地  
湖嶠行萬里路詩益奇壯造次不忘憂愛以簡嚴埽

繁縟以雄渾代尖巧第其品格當在諸家之上劉辰  
溪序其詩亦謂較勝黃陳比東坡云如論花高品則  
色不如香逼真則香不如色其推尊如此簡齋自言  
曰詩至老杜極矣蘇黃復振之而正統不墜東坡賦才  
大故解縱繩墨之外而用之不窮山谷措意深故游  
泳玩味之餘而索之益遠要必識蘇黃之所不為然  
後可以涉老杜之涯涘味此足以定其品格矣簡齋  
晚年讀書吾邑之 缺 鄉有遺蹟云

次韻謝文驥主簿見寄兼示劉宣教

斷蓬隨天風飄蕩去何許  
寒草不自振生死衣牆堵兩  
塗俱寂寞衆手劇雲雨  
坐令習主簿下與雞鶩伍  
遙知竹林交未肯一時數  
翩翩三語掾智與慢相補  
髯劉吾所畏道屈空去魯  
子才亦落落傾蓋極許予  
四夔照河濱一笑寬逆旅  
堂堂吾景方張儀掾字去作泉下土  
未知我露電能復幾寒暑  
思尊久未決食齋轉覺苦  
我不逮諸子要先諸子去  
不種楊惲田但灌吕安圃  
未知誰善釀可



作孔文舉十年亦晚矣請便事斯語

來詩有十年之約

次韻周教授秋懷

一官不辦作生涯  
幾見秋風捲岸沙  
宋玉有文悲落木  
陶潛無酒對黃花  
天機袞袞山新瘦  
世事悠悠日自斜  
誤矣載書三十乘  
東門何地不宜瓜

次韻張矩臣迪功見示建除體

建德我故國  
歸哉邁我驅  
除道得歡伯  
荊棘無復餘  
滿懷秋月色  
未覺飢腸虛  
平林過西風  
為我起笙竽  
定知

張公子能共寂寞娛執此以贈君意重貂襜褕破帽與  
青鞋耐久心亦舒危處要進步安處勿停車成虧在道  
德不在功利區收視以為期問君此何如開尊且復飲  
辭費道已迂閉口味更長香斷窓樵疎

題牧牛圖

千里煙草綠連山雨新足老牛抱朝飢向山影覓  
兒狂走先過浦却立長鳴待其母母子為人實倉廩汝  
飽不慙人愧汝牧童生來日日娛只憂身大當把鋤日

斜睡足牛背上不信人間有黃輿

江南春

雨後江上綠客悲隨眼新桃花十里影搖蕩一江春朝  
風逆船波浪惡暮風送船無處泊江南雖好不如歸老  
齊遠牆人得肥

蠟梅

智瓊額黃且勿誇回眼視此風前葩家家融蠟作杏帶  
歲歲逢梅是蠟花世間真偽非兩法映日細看真是蠟

我今嚼蠟已甘腴況此有韻蠟不如只愁繁香欺定力薰我  
欲醉須人扶不辭花前醉倒卧經月是酒是香君試別

次韻張元方春雪

雲黃天為低窗白雪初作幽人睡方覺簾外舞萬鶴斜  
斜既可人整整亦不惡不知來何暮遂失梅花約東風  
桃杏暖不受珠璣絡聊迴萬斛潤點點付藜藿幽人無  
酒飲一笑供酬酢歲晚會復來相期在丘壑

雜書示陳國佐胡元茂四首

一官專為口俯仰汗我顏顧將十日飢換此三歲閒冥冥  
雲表雁時節自往還不憂稻粱絕憂在羅網間絕勝杜  
拾遺一飽常間闕晚知儒冠誤猶戀終南山

杜門十日疾因得觀妄身勿云千金軀今視如埃塵平  
生老赤腳每見生怒嗔揮汗煮我藥見此媿其勤

巨源邦之棟急士如拾珍定知柳下鍛遠勝崔史陳絕  
交雖已隘益見叔夜真士要雖衣食求仁今得仁釋之  
與王生盛美俱絕倫吾評竹林詠未可少居人

吾昔同年友壯志各南溟十年風雨過見此落落星秀  
者吾元茂衆器見鼎錙許身稷卨間不但醉六經時逢  
下車揖慰我兩眼青勿憂事不理伯始在朝廷

書懷示友十首

俗子令我病紛然來座隅賢士費懷思不受折簡呼城  
東陳孟公久濶今何如明月照天下此夕與君俱不難  
十里勤畏借東家驢似聞有老眼能作薦鶚書功名勿

念我此心已埽除

陳孟公  
謂國佐

張子霜後鷹眉骨非凡曹不肯兄事錢但欲僕命騷胡  
為隨我輩碌碌著青袍相逢車馬邊技癢不得搔

平生詩作祟腸肚困藿食使我忘隱憂亦自得詩力絕  
知是餘蔽且復永今日不知付盃酒一笑萬事畢毛穎  
僅升堂麴生真入室

我夢鍾鼎食或作山林遊當其適意時略與人間侔覺  
來跡便埽我已不悲憂人間安可比夢中無悔尤

我策三十六第一當歸田柴門種雜樹婆娑樂餘年是

中三益友不減二仲賢柏樹解說法桑葉能通禪

有錢可使鬼無錢鬼揶揄百年堂前燕萬事屋上烏微  
官不救飢出處違壯圖相牛豈無經種樹亦有書如何  
求二頃歸卧淵明廬曝背對青山鳥鳴人意舒試數門  
前客終歲幾覆車

仲舒老一經策世非所長瓦鼎薦蔬食但取充飢腸偉  
哉賈生書開闔有耿光既珍亦可飽舉俗不見嘗

揚雄平生學肝腎困雕鐫晚於玄有得始悔賦甘泉使



雄早大悟亦何事於玄賴有一言善酒箴真可傳

蕭蕭十月菊耿耿照白草開窗逢一笑未覺徐娘老風  
霜要飽更獨立晚更好韓公真躁人顧用憂懷抱

青青堂西竹歲寒不緇磷蓬蒿衆小中拭眼見長身澹  
然冬日影此處極可人子猷幸見過一洗聲色塵

北風

北風掠野悲歲暮黃塵漲街人不度孤鴻抱飢客千里  
性命么微不當怒梅花欲動天作難蓬飛上天得盤桓

千里卧木枝葉盡獨自人間不受寒

送張仲宗押戟歸閩中

翩然鴻鵠本不羣亦復為口長紛紛去年弄影河北月  
今年迎面江南雲還家不比陶令冷持節正效相如勤  
青天白日映徒御玄髮絳旆明江濱舟前落花慰野老  
浦口杜若愁湘君遙知詩成值驛使萬里春色當見分  
贈人以言予豈敢不忍負子聊云云舊山雖好慎勿過  
恐有德璋能勤文

襄邑道中

飛花兩岸照船紅  
百里榆堤半日風  
卧看滿天雲不動  
不知雲與我俱東

寄新息家叔

風雨淮西夢危魂  
費九升一官遮日手  
兩地讀書燈見客  
深藏舌吟詩不負丞  
竹林雖有約門戶要人興

年華

去國頻更歲為官  
不救飢春生殘雪外  
酒盡落梅時白

日山川映青天草木宜年華不負客一一入吾詩

茅屋

茅屋年年破春風歲歲來寒從草根退花值客愁開時  
序添詩卷乾坤進酒盃片雲無思極日暮却空回

酴醾

雨過無桃李唯餘雪覆牆青天映妙質白日照繁香影  
動春微透花寒韻更長風流到尊酒猶足助詩狂

秋雨

蕭蕭十日雨，穩送祝融歸。  
燕子經年夢，梧桐昨暮非。  
一涼恩到骨，四壁事多違。  
袞袞繁華地，西風吹客衣。

西風

水末西風起，中含萬里涼。  
浮雲不愁思盡日，只飛揚夢  
斷頭。將白詩成，葉自黃，不關明主棄。本出涸陰鄉。

題許道寧畫

滿眼長江水，蒼然何郡山。  
向來萬里意，今在一窻間。  
衆木俱含晚，孤雲遂不還。  
此中有佳句，吟斷不相關。

和張矩臣水墨梅五絕

巧畫無鹽醜不除此花風韻更清殊從教變白能為黑  
桃李依然是僕奴

病見昏花已數年只應梅蕊故依然誰教也作陳玄面  
眼亂初逢未敢憐

粲粲江南萬玉妃別來幾度見春歸相逢京洛渾依舊  
唯恨緇塵染素衣

含章簷下春風面造化功成秋兔毫意足不求顏色似

前身相馬九方臯

自讀西湖處士詩  
年年流水看幽姿  
晴窗畫出橫斜影  
絕勝前村夜雪時

夜雨

經歲柴門百事乖  
此身只合卧蒼苔  
蟬聲未足秋風起  
木葉俱鳴夜雨來  
碁局可觀浮世理  
燈花應為好詩開  
獨無宋玉悲歌念  
但喜新涼入酒盃

以事走郊外示友

七  
十  
二  
二十九年知已非今年依舊壯心違黃塵滿面人猶去  
紅葉無言秋又歸萬里天寒鴻雁瘦千村歲暮烏鳥微  
往來屑屑君應笑要就南池照客衣

十月

十月北風催歲闌九衢黃土汙儒冠歸鴉落日天機熟  
老雁長雲行路難欲詣熱官憂冷語且求濁酒寄清歡  
孤吟坐到三更月枯木無枝不受寒

題小室



暫脫朝衣不當閒澶州夢斷已多年諸公自致青雲上  
病客長齋繡佛前隨意時為獅子卧安心懶作野狐禪  
爐烟忽散無蹤跡屋上寒雲自黯然

次韻張迪功春日

年年春日寒欺客今日春無一半寒不覺轉頭逢歲換  
便須揩眼待花看爭新游女幡垂髻依舊先生日照盤  
從此不憂風雪厄杖藜時可過蘇端

又和歲除感懷用前韻

袞袞諸公車馬塵先生孤唱發陽春黃花不負秋風意  
白髮空隨世事新閉門讀書真得計載肴從學豈無人  
只應又被支郎笑從者依然困在陳

次韻答張迪功坐上見貽張將赴南都任二首

足錢便可不須侯免對妻兒賦百憂一笑相逢亦奇事  
平生所得是清流談天安用如鄒子埽地還應學趙州  
南北東西底非夢心閒隨處有真遊

千首能輕萬戶侯誦君佳句解人愁夢闌塵裏功名晚

笑罷尊前歲月流  
世事無窮悲客子  
梅花欲動憶吾州  
明年又作河梁別  
莫負平生馬少游

題畫兔

碎身鷹犬慙何忍  
理骨詩書事亦微  
霜落深林可終歲  
雄雌暖日莫忘機

寄若拙弟兼呈二十家叔

退之送窮窮不去  
樂天待富貴不來  
政須青山映黑髮  
顧著阜蓋爭黃埃  
何如父子共一壑  
龐家活計良不惡

阿奴況自不碌碌白鷗之盟可同諾三間瓦屋亦易求  
著子東頭我西頭中間共作老萊戲世上樂復有此不  
問夢膏肓應已瘳歸來歸來無久留竹林步兵非俗流  
為道此意思同遊

次韻謝表兄張元東見寄

平生張翰極風流好事工文妙九州燈裏偶然同一笑  
書來已似隔三秋林泉入夢吾當隱花鳥催詩歲不留  
安得清談一陶寫令人絕憶許文休

若拙弟說汝州可居已約卜一丘用韻寄元東

四歲冷官居濮地三年羸馬帝王州  
陶潛迷路已良遠張翰思歸那待秋  
病鶴欲飛還躑躅孤雲將去更遲留  
盍簪共結雞豚社一笑相從萬事休

次韻家弟碧線泉

九孔穿針可得過冰蠶映日吐寒波  
練飛空詠徐凝水帶斷疑分漢帝河  
川后不愁微步襪鮫人暗動卷綃梭  
才高下視玄虛賦對此區區轉患多

同家弟賦蠟梅詩得四絕句

朱朱與白白著意待春開那知洞房裏已傍額黃來  
韻勝誰能舍色莊那得親朝陽一映樹到骨不留塵  
黃羅作廣袂絳帳作中單人間誰敢著留得護春寒  
一花香十里更值滿枝開承恩不在貌誰敢鬪香來

連雨賦書事四首

九月逢連雨瀟瀟穩送秋龍公無乃倦客子不勝愁雲  
氣昏城壁鐘聲咽寺樓年年授衣節牢落向他州

風伯方安卧雲師亦少饗氣連河漢潤身到竹窻高老  
鶴尤貪去寒蟬遂不號相悲更相識滿眼楚人騷

寒入新芻價連天兩眼愁生涯赤藤杖契公黑貂裘烏  
鵲無言暮蓬蒿滿意秋同時不同味世事劇悠悠

白菊生新紫黃蕪失舊青俱含歲晚恨併入夜深聽夢  
寐連蕭索更籌亂晦冥雲移過吳越應為洗餘腥

趙虛中有石名小華山以詩借之

君家蒼石三峰樣磅礴乾坤氣象橫賤子與山曾半面

小窻如夢慰平生  
爐煙巧作公超霧  
書冊尚避秦王城  
病眼朝來欲開懶  
借君岩岫障新晴

次韻樂文卿北園

故園歸計墮虛空  
啼鳥驚心處處同  
四壁一身長客夢  
百憂雙鬢更春風  
梅花不是人間白  
日色爭如酒面紅  
且復高吟置餘事  
此生能費幾詩筒

汝州吳學士觀我齋分韻得真字

狂夫縛軒冕自許稷契身  
靜者樂山林謂是羲皇人不



如兩忘快內保一色醇偉哉道山傑滯此汝水濱大來  
會濶步小憇得幽欣一齋有琴酒萬事無緇磷不作子  
公書肯受元規塵人言君侯癡我知丈人真月明泉聲  
細雨過竹色新是間有真我宴坐方申申

古別離

東門柳年年歲歲征人手千人萬人於此別柳亦能堪  
幾人折願君遄歸與君期要及此柳未衰時

蠟梅四絕

金華集卷十二  
花房小如許銅切黃金塗中有萬斛香與君細細輸  
來從底處所黃露滿衣濕緣慙翻得憐亭亭倚風立  
奕奕金仙面排行立曉晴殷勤夜來雪少住作珠璣  
亭亭金步搖朝日明漢宮當時好光景一似此園中

錢東之教授惠澤州呂道人硯為賦長句

君不見銅雀臺邊多事土走上觚稜蔭歌舞餘香分盡  
垢不除却寄書林汗縑楮豈如此瓦凝青膏冷面不識  
姦雄曹呂翁已去泣餘泣通譜未許弘農陶暮年得君

真耐久摩娑玉質雲生手未知南越石虛中亦有文章  
似君否西家樸滿本弟昆趣清尚濁何年分一朝墮地  
真瓦礫莫望韓公無瘞文

述懷呈十七家叔

兒時學道逃悲歡只今未免憂飢寒浮生萬事蟻旋磨  
冷官十年魚上竿竹林步兵亦忍辱長安閉門出無僕  
門前故人擁廬兒政坐向來甘碌碌君不見古人有待良  
不多利名溺人甚風波垂露成幃幃仲長統明月為燭張志

和塵中別多會日少世事欲談何可了  
胃中萬卷已無用勸公留眼送飛鳥  
兩翁觀光今幾時賦歸有約時已稽  
未暇藏身北山北且須覓地西枝西  
願從我翁歸洗耳不用妓女汙山水  
肩輿亦莫要僕夫自有門生與兒子

觀我齋再分韻得下字

一慵縛兩脚閉戶了晨夜夢攀城西樹  
起造君子舍紫髯出堂堂見客披衣謝  
平生功名手嗜靜如食蕉小齋

劇冰壺中明外無罅要知日用事跌坐看鳥下主人心  
了了竹石亦閒暇兒童慣看客我車當日駕平分齋中  
閒風月不待借要須酒屢費不用牛心炙

歸洛道中

洛陽城邊風起沙征衫歲歲負年華歸途忽踐楊柳影  
春事已到蕪菁花道路無窮幾傾轂牛羊既飽各知家  
人生擾擾成底事馬上哦詩日又斜

道中寒食

斗粟淹吾駕浮雲笑此生有詩酬歲月無夢到功名客  
裏逢歸雁愁邊有亂鶯楊花不解事更作倚風輕

龍門

不到龍門十載強斷崖依舊掛斜陽金銀佛寺浮佳氣  
花木禪房接上方羸馬乍來還徑去流鶯多處最難忘  
老僧不作留人意看水看山白髮長

秋夜

中庭淡月照三更白露洗空河漢明莫遣西風吹葉盡

却愁無處著秋聲

中年道中二首

雨意欲成還未成  
歸雲却作伴人行  
依然壞郭中年縣  
千尺浮屠管送迎

楊柳招人不待媒  
蜻蜓近馬忽相猜  
如何得與涼風約  
不共塵沙一併來

秋雨

塵起一月憂無禾  
瓦鳴三日憂雨多  
書生重口輕肝腎

不如牆角蚯蚓方長哦少昊行秋龍灑道風作萬木皆  
商歌病夫強起開戶立萬箇銀竹驚森羅人間偉觀如  
此少倚杖不覺泥及鞞菊叢欹倒未足道老景知奈梧  
桐何是事且置當務本菜圃已添三萬科

遊葆真池上

牆厚不盈咫人間隔蓬萊高柳喚客遊我輩御風來坐  
久落月盡澹澹池光開白雲行水中一笑三徘徊鴨兒  
輕歲月不受急景催試作弄篙驚徐去首不迴無心與



境接偶遇信悠哉再來知何似有句端難裁

奏書初不待衡譚奠璧都來萬玉參黃屋倚霄明半夜  
紫壇承月眩諸龕聲喧大呂初終六影動元圭陟降三  
可是天公須羯報已迴寒玉作春酣

路歸馬上再賦

偶然思玉仙便到玉仙遊興盡未及郭玉仙失回頭成  
毀俱一念今昔浪百憂未知橫笛子亦解此意不春風  
所經過水色如潑油垂鞭看落日世事劇悠悠

來禽花

來禽花高不受折  
滿意清明好時節  
人間風日不貸春  
昨夜胭脂今日雪  
舍東蕪菁滿眼黃  
蝴蝶飛去專斜陽  
妍嗤都無十日事  
付與梧桐一夏涼

清明二首

街頭女兒雙髻鴉  
隨蜂趁蝶學天邪  
東風也作清明節  
開遍來禽一樹花

卷地風拋市井聲  
病扶危坐了清明  
一簾晚日看收盡

楊柳微風百媚生

春日二首

朝來庭樹有鳴禽  
紅綠扶春上遠林  
忽有好詩生眼底  
安排句法已難尋

憶看梅雪縞中庭  
轉眼桃稍無數青  
萬事一身雙鬢髮  
竹牀欹卧數窻櫺

夏日集葆真池上以綠陰生畫靜賦詩得靜字

清池不受暑  
幽討起予病  
長安車轍邊  
有此荷萬柄  
是

身唯可懶共寄無盡興魚遊水底涼鳥語林間靜談餘  
日亭午樹影一時正清風不負客意重百金贈聊將兩  
鬢蓬起照千丈鏡微波喜搖人小立待其定梁王今何許  
柳色幾衰盛人生行樂耳詩律已其賸邂逅一尊酒他  
年五君詠重期踏月來夜半嘯煙艇

道山宿直

離離樹子鵲驚飛獨倚枯筇無限時千丈虛廊貯明月  
十分奇事更新詩人間路絕窻扉語天上雲空閣影移

遙想王戎燭下算百年辛苦一生癡

雨晴

天缺西南江面清  
纖雲不動小灘橫  
牆頭語鵲衣猶濕  
樓外殘雷氣未平  
盡取微涼供穩睡  
急搜奇句報新晴  
今宵勝絕無人共  
卧看星河盡意明

十月

十月天公作許悲  
負霜鴻雁不停飛  
莽連萬里雲山去  
紅盡秋林秋徑歸  
病夫搜句了節序  
小齋焚香無是非

睡過三冬莫開戶北風不貸芟荷衣

漫郎

漫郎功業太悠然柱笏看山了十年黑白半頭明鏡裏  
丹青千樹惡風前星霜屢費驚人句天地元須使鬼錢  
踏破九州無一事只今分付結跏禪

柳絮

柳送腰肢日幾迴更教飛絮舞樓臺顛狂忽作高千丈  
風力微時穩下來

登天清寺塔

為眼不計脚攀梯受微辛半天拍闌干驚倒地上人風  
從萬里來老夫方岸巾荒荒春浮水浩浩空納塵夕陽  
差萬瓦赤鯉欲動鱗須臾暮煙合青魴隱齋淪萬化本  
日馳高處覺眼新借問龕中仙坐穩今幾晨俗子書滿  
壁澹然不生嗔唯有太行山修供獨殷勤

浴室觀雨以催詩走羣龍為韻得走字

微雲生屋脊欹枕看培塿崔嵬亂一瞬秦華入搔首須

與萬銀竹壯觀驚戶牖推擊竟自碎映空白煙走餘飄  
送未了日色在井口去冬三寸雪寒日澹相守商量細  
細融未覺經旬久誰能料天公辦此脫穎手一涼滿天  
地平分到庭柳葉端嘯餘風送我一杯酒畫屏題細字  
盡記同來友俗眼之所遺此事當不朽

夏至日與太學同舍會葆真二首

微官有閤閱三賦池上詩林密知夏深仰看天離離官  
忙負遠興觴至及良時荷氣夜來雨百鳥青晝遲微風



不動蘋坐看水色移門前爭奪場取歡不償悲欲歸未  
得去日暮多黃鸝

明波影千柳紺屋朝萬荷物新感節移意定覺景多遊  
魚聚亭影鏡面散微渦江湖豈在遠所欠雨一蓑忽看  
帶箭禽三歎無奈何

秋試院將出書所寓窻

門前柿葉已堪書弄鏡燒香聊自娛百世窻明窻暗裏  
題詩不用著工夫

夏日

赤日可中庭樹影斂不開燭龍未肯忙一步九徘徊夢  
中驚耳鳴忽覺聞遠雷屋上奇峰起欹枕看雲來變化  
信難料轉頭失崔嵬雖然不成雨風起亦快哉槐葉萬  
背白少振十日埃白團豈辨此擲去羞薄才蜻蜓泊牆  
陰近人故多猜牆西豈更熱已去復飛迴

送王周士赴發運司屬官

寧食三斗塵有手不揖無詩人寧飲三斗醋有耳不聽

無味句牆東草深蘭發薰君先夢我我夢君小窻夢詩  
燈花喜窻外北風怒未已書生得句勝得官風其少止  
盡人歡五更月暈一千丈明日君當泛淮浪去去三十  
六策中第一買酒麴北風

試院書懷

細讀平安字愁邊失歲華疎疎一簾雨淡淡滿枝花投  
老詩成癖經春夢到家茫然十年事倚杖數栖鴉

寄題兗州孫大夫絕塵亭

境空納浩蕩日暮生沈寥竹聲池邊起欲斷還蕭蕭丈  
人方微吟萬象各動搖林間光景異月出東山椒門前  
誰剝啄已逝不須邀

休日早起

朧朧窻影來稍稍禽聲集開門知有雨老樹半身濕劇  
讀了無味遠遊非所急蒲團著身寬安取萬戶邑開鏡  
白雲度捲簾秋光入飽受今日閒明朝復羈縻

碁

長日無公事閒園李遠碁傍觀真一笑互勝不移時幸  
未逢重霸何妨著獻之晴天散飛電驚動隔牆兒

冬至二首

少年多意氣老去一分無閉戶了冬至日長添數珠北  
風不待節鴻雁天南驅烏帽獨何幸七日守屋廬石爐  
深炷火撩亂一榻書只可自怡悅不堪寄張扶

人生本是客杜叟顧未知今年我聞道悲樂兩脫遺日  
色如昨日未覺墉陰遲不須行年記異代尋吾詩東家

窈窕娘融蠟幻梅枝但恐負時節那知有愁時

西省醑醑架上殘雪可愛戲同王元忠席大光賦

詩

醑醑花底當年事夜雪模糊照酒闌北省今朝枝上雪  
還揩病眼作花看

對酒

新詩滿眼不能裁鳥度雲移落酒杯官裏簿書無日了  
樓頭風雨見秋來是非衮衮書生老歲月忽忽燕子回

笑撫江南竹根枕一尊呼起鼻中雷

後三日再賦

天生癭木不須裁說與兒童是酒杯落日留霞知我醉  
長風吹月送詩來一官擾擾身增病萬事悠悠首獨回  
不奈長安小車得睡鄉深處作奔雷

赴陳留二首

草草一夢闌行止本難期歲晚陳留路老馬三振鬣自  
看鞭袖影曠野日落遲柳林行不盡想見春風時點點

羊散村陳陳鴻投陂城中那有此觸處皆新詩舉手謝  
路人醉語勿瑕疵我行有官事去作三年痴遙聞辟穀  
仙閱世河水濁時從玩木影政爾不憂飢

馬上摩娑眼出門光景新鴉鳴半陂雪路轉一林春舊  
歲有三日全家無十人平生鸚鵡盞今夕最關身

至陳留

煙際停停塢招人可得回等閒為夢了聞健出關來日  
落河冰壯天長鴻雁哀平安遠遊意隨處一徘徊



客裏

客裏東風起逢人只四愁  
悠悠雜唯唯莫莫更休休  
窻影鳥雙度水聲船逆流  
一官成一集盡付古河頭

對酒

陳留春色撩詩思一日搜腸一百迴  
燕子初歸風不定  
桃花欲動雨頻來  
人間多待須微祿  
夢裏相逢記此杯  
白竹扉前容醉舞  
煙村渺渺欠高臺

感懷

少日爭名翰墨場只今扶杖送斜陽  
青青草木浮元氣渺渺山河接故鄉  
作吏不妨三折臂搜詩空費九迴腸  
子房與我同羈旅世事千般酒一觴

實園醉中前後五絕句

東風吹雨小寒生楊柳飛花亂晚晴  
客子從今無可恨實家園裏有鶯聲

海棠脈脈要詩催日暮紫綿無數開  
欲識此花奇絕處明朝有雨試重來

不見海棠相似人空題詩句滿花身酒闌却度荒陂去  
馳使風光又一春

三月碧桃驚動人滿園光景一時新賸傾老子尊中玉  
折盡繁枝不要春

一尊相屬莫辭空報答今朝吹面風自唱新詩與明月  
碧桃開盡雨聲中

雨

沙岸殘春雨茅簷古鎮官一時花帶淚萬里客憑欄日

晚薔薇重樓高燕子寒惜無陶謝手盡力破憂端

題酒務壁

野馬本不羈無奈卯與申當時彭澤令定是英雄人客  
來兩繩牀客去一欠伸市聲自雜香鑪烟自輪囷鶯聲  
時節改杏葉雨氣新佳句忽墮前追摹已難真自題西  
軒壁不雜徐庾塵

秋夜詠月

庭樹日日疎稍覺夜月添推愁了此段卷我三間簾黃

花牆陰遠白髮露氣嚴平生六尺影隨我送涼炎踏破  
千憂地投老乃自嫌尚想采石江宮錦映霜蟾夜半賦  
詩成起舞魚龍兼辦此詎難事取快端宜廉

入城

竹輿聲伊鴉路轉登古原孟冬郊澤曠細水鳴蘆根霧  
收浮屠立天濶鴻雁奔平生厭喧鬧快意三家村思生  
長林內故園歸不存欲為唐衢哭聲出且復吞

夜步隄上三首

世故生白髮意行無與期平生本上座臨老始相知月  
中沙岸永歲暮河流遲留侯廟前柳葉盡空離離百年  
信難料賸賦奇絕詩

人間睡聲起幽子方獨步倚杖看白雲亭亭水中度十  
月雁背高三更河流去物生各擾擾念此煎百慮聊將  
憂世心數遍橋西樹

旋買青芒鞋去踏沙頭月爭教冠蓋地著此影突兀樹  
寒栖鳥動風轉孤管發月色夜夜佳人生事如髮夢中

續清遊濃濕銀闕

晚步

手把古人書閒讀下廣庭荒村無車馬日落雙檜青曠  
然神慮靜濁俗非所寧逍遙出荆扉竚立瞻郊垌須臾  
暮色至野水皆晶熒却步面空林遠意更杳冥停雲甚  
可愛重疊如沙汀

同楊運幹黃秀才村西買山藥

潦縮田路寬委蛇散腰脚勝日三杖杖村西買山藥岡

巖相吞吐遠水互前却天陰野水明歲暮竹籬薄田翁  
領客意發筐堆磊落玉質紺色裘用世乃見縛屠門幾  
許快夜語尋幽約石鼎看雲翻門前北風惡

招張仲宗

北風日日吹茅屋幽子朝朝出地爐客裏賴詩增意氣  
老來唯懶是工夫空庭喬木無時事殘雪疎籬當畫圖  
亦有張侯能共此焚香相待莫徐驅

寓居劉倉廨中晚步過鄭倉臺上



紗巾竹杖過荒陂，滿面春風二月時。  
世事紛紛人易老，春陰漠漠絮飛遲。  
士衡去國三間屋，子美登臺七字詩。  
草遶天西青不盡，故園歸計入支頤。

八閩僧房遇雨

脫履坐明窻，偶至情更適。  
池上風忽來，斜雨滿高壁。  
探松含歲暮，幽鳥立晝寂。  
世故方未闌，焚香破今夕。

贈黃家阿莘

君家阿莘如白玉，呼出燈前語陸續。  
可憐郎罷窮一生。

只今有汝照茅屋猪生十子豚復豚阿莘明年可當門  
階庭一笑不外索萬事紛紛何足論

發商水道中

商水西門語東風動柳枝年華入危涕世事本前期草  
草檀公策茫茫杜老詩山川馬前濶不敢計歸時

西軒寓居

牢落西軒客巡簷費獨吟桃花明薄暮燕子鬧微陰辛  
苦元吾事淹留更此心小窻隨意寫蛇蚓起相尋

鄧州西軒書事十首

小儒避賊南征日  
皇帝行天第一春  
走到鄧州無脚力  
桃花初動雨留人

千里空攜一影來  
白頭更著亂蟬催  
書生身世今如此  
倚遍周家十二槐

瓦屋三間寬有餘  
可憐小陸不同居  
易求蘇子六國印  
難得河橋一字書

莫嫌啖蔗佳景遠  
橄欖甜苦亦相并  
都將壯節共辛苦

準擬殘年看太平

皇家卜年過周歷變故未必非天仁東南鬼火成何事  
終朝胡蜂作爭臣

楊劉相傾建中亂不待白首今同歸只今將相須廉藺  
五月并門未解圍

不須夜夜看太白天地景氣今如斯始行彼我相攻策  
可惜中原見事遲

詔書憂民十六事父老祝君一萬年白髮書生喜無寐

從今不仕可歸田

范公深憂天下日仁祖愛民全盛年遺廟只今香火冷  
時飄楓葉一騷然

諸葛經行有夕風千秋天地幾英雄弔古不須多感慨  
人生半夢半醒中

晚步順陽門外

六尺枯藜了此生順陽門外看新晴樹連翠篠圍春晝  
水泛青天入古城夢裏偶來那計日人間多事更聞兵

只應十載溪橋路欠我嬾姍勃窣行

縱步至董氏園亭二首

槐葉層層新綠生客懷依舊不能平  
自移一榻西窗下要近叢篁聽雨聲

客子今年駝褐寬鄧州三月始春寒  
簾鉤挂盡蒲團穩十丈虛庭借雨看

題簡齋

我窻三尺餘可以閱晦明北省雖巨麗  
無此風竹聲不

著散花女而況使鬼兄世間多岐路居士繩牀平未知  
阮遙集幾屐了平生領軍一屋鞋千載笑絕纓槐陰自  
入戶知我喜新晴覓句方未了簡齋真虛名

春雨

花盡春猶冷羈心只自驚孤鶯啼永晝細雨濕高城擾  
擾成何事悠悠送此生蛛絲閃夕霽隨處有誰情

登城樓

去年夢陳留今年夢鄧州幾夢即了我一笑城西樓新晴

草木麗落日淡欲收遠川如動搖景氣明田疇百年幾  
憑欄亦有似我不城陰坐來失白水光不流丈夫貴快  
意少住寬千憂歸嫌簡齋陋促生為白頭

雨

忽忽忘年老悠悠負日長小詩妨學道微雨好燒香簷  
鵲移時立庭梧滿意涼此身南復北彷彿是他鄉

夏夜

閒弄玉如意天河白練橫時無李供奉誰識謝宣城兩



鵲翻明月孤松立快晴南陽半年客復此滿懷清

鄧州城樓

鄧州城樓高百尺楚岫秦雲不相隔傍城積水晚更明  
照見綸巾倚樓客李白上天不可呼陰晴變化還須臾  
獨撫危欄詠奇句滿樓風月不枝梧

秋日客思

南北東西俱我鄉聊從地主借胡牀諸公共得河侯力  
遠客新抄陸氏方老去事多藜杖在夜來秋到葉聲長

蓬萊可託無因至試覓人間千仞岡

道中書事

臨老傷行役籃輦歲月奔客愁無處避世事不堪論白  
道含秋色青山帶雨痕壞梁斜闔水喬木密藏村易破  
還家夢難招去國魂一身從白首隨意答乾坤

美哉亭

西出城臯闔土谷僅容馳天掛一疋練雙崖闔嵯峨忽  
然五丈闕亭構如危窠青山麗中原白日照大河下視

萬里川草木何其多臨臯一吐氣却奈雄風何辛苦生  
一快造化巧揣摩險易終不償翻身下殘坡

與季申信道自光化復入鄧書事四首

孫子白木杖富子黑油笠我獨白竹籃差池復相及夕  
陽橋邊盡岸幘歸雲急勿語城中人從渠慎出入

賣舟作歸計竹籃穩如舟霧收青臯濕行路當春遊老  
馬不自知意欲踏九州依然還故櫪寂寞壯心休

再來生白髮重見鄧州春依舊城西路桃花不記人卜

居得窮巷日色滿窻新微吟驚市卒獨鶴語城闌  
城西望城南十日九相隔何日三杖杖共踏江上石門  
前流水過春意滿渠碧遙知千頃江如今好顏色

寄李申

雨歇城南泥未乾遙知獨立整衣冠舊時鄴下劉公幹  
今日遼東管幼安綠陰展盡身猶遠黃鳥飛來節已闌  
安得一尊生耳熱暫時相對說悲歡

重陽

去歲重陽已百憂今年依舊歎羈遊  
籬底菊花唯解笑鏡中頭髮不禁秋  
涼風又落宮南木老鴈孤鳴漢北州  
如許行年那可記謾排詩句寫新愁

有感再賦

憶得甲辰重九日天恩曾預宴城東  
龍沙此日西風冷誰折黃花壽兩宮

感事

喪亂那堪說干戈竟未休公卿危左社  
江漢故東流風

斷黃龍府雲移白鷺洲云何舒國步持底副君憂世事  
非難料吾生本自浮菊花紛四野作意為誰秋

送客出城西

鄧州誰亦解丹青畫我羸驂曉出城殘年政爾供愁了  
末路那堪送客行寒日滿川分衆色暮林無葉寄秋聲  
垂鞭歸去重回首意落西南計未成

得席大光書因以詩迓之

十月風高客子悲故人書到暫開眉也知廊廟當推轂

無奈江山好賦詩萬事莫論兵動後一杯當及菊殘時  
喜心翻到相迎地不怕荒林十里陂

無題

六經在天如日月萬事隨時更故新江南丞相浮雲壤  
洛下先生宰木春孟嘉何妨改師法京房底處有門人  
舊喜讀書今懶讀焚香閱世了閒身

正月十二日自房州城遇金人至奔入南山十五  
日抵回谷張家

久謂事當爾豈意身及之避寇連三年行半天四維我  
非洛豪士不畏窮谷飢但恨平生意輕了少陵詩今年  
奔房州鐵馬背後馳造物亦惡劇脫命真毫釐南山四  
程雲布襪傲險巇籬間老炙背無意管安危知我是朝  
士亦復顰其眉呼酒軟客脚菜本濯玉肌窮途士易德  
歡喜不復辭向來貪讀書閉戶生白髭豈知九州內有  
山如此奇自寬實不情老人亦解頤投宿恍世外青燈  
耿茅茨夜半不能眠澗水鳴聲悲





宋詩鈔卷四十二